

Headlines

1. गृह मंत्री अमित शाह होरें बन्नं दी सुरक्षा दे कन्नो-कन्नो घुसपैठ रोकने ते खब्बे पक्खी अत्तवाद दा मुकाबला करने च सीमा सुरक्षा बल दे जतनें दी सराहना कीती ऐ।
2. उधमपुर जिले च पुलसा दे इक जवान नै अपने साथी दी गोली मारियै हत्तेआ करने परैन्त आपूं बी आत्महत्या करी लैती।
3. लेफ्टिनेंट गवर्नर मनोज सिन्हा होरें विद्यार्थिं अंदर छप्पी दी समर्थ गी सामने आह्नेने च अध्यापकें दी भूमिका पर लोऽ पाई ऐ।
4. मौसम विभाग नै अगले द'ऊं दिनें दरान जम्मू-कश्मिर च हौली बरखा ते बर्फबारी दी पेशगोई कीती ऐ।
5. महिलाएं दी जूनियर एशिया कप हॉकी प्रतियोगिता दे शुरुआती मैच च अज्ज भारत दा मुकाबला बंगलादेश कन्नै होग।

<><><><><><>

Amit Shah BSF

गृह मंत्री अमित शाह होरें आखेआ ऐ जे सीमा सुरक्षा बल अपनी दलेरी, शौर्य ते बलिदान दे दम उप्पर 6 दहाकें थमां देशे दी सीमा सुरक्षा दी पैहली पंक्ति गी मजबूत करने लेई कम्म करै करदा ऐ। जोधपुर च अज्ज सीमा सुरक्षा बल दे 60में स्थापना दिवस गी संबोधित करदे होई श्री शाह होरें आखेआ जे 1965 थमां देशे दे पूर्वी ते पच्छमी बन्नं गी सुरक्षित रक्खने च सीमा सुरक्षा बल नै उत्कृष्ट कम्म कीता ऐ। गृह मंत्री होरें आखेआ जे सीमा सुरक्षा बल नै घुसपैठ, जाली नोटें ते वामपंथी उग्रवाद गी रोकने सने बक्ख-बक्ख मोर्चे पर कम्म कीता ऐ। गृहमंत्री होरें आखेआ जे सीमा सुरक्षा बल दे बगैर देशे दी बधदी सुरक्षा जरूरतें गी पूरा करना मुमकन नैई ऐ। इयै वजह ऐ जे 25 बटालियन दे कन्नै स्थापत कीते गेदे सीमा सुरक्षा बल दा लगातार विस्तार होआ करदा ऐ। गृहमंत्री होरें आखेआ जे भारत सरकार नै बन्नं पर बुनियादी ढांचे गी मजबूत करने बक्खी चेचा ध्यान दित्ता ऐ ते एह्दे लेई हर ब'रे बजट च विशेष प्रावधान कीता जंदा ऐ। उनें आखेआ जे सरकारै बन्नं पर स्थित ग्रांएं लेई जीवंत ग्राम योजना शुरू कीती ऐ, जेह्दे'नै बन्नं आहले ग्रांएं च

रौहने आहले लोकें गी सम्मान, रोजगार ते सब्बै बुनियादी सुविधां उपलब्ध करोआइयां जाई सकन। तकरीबन 3 ज्हार ग्रांएं च आज़माईश दी बिनाहू उप्पर एहू कार्यक्रम शुरू कीता गेआ हा। गृहमंत्री होरें जवानें गी उंदी उत्कृष्ट सेवाएं लेई वीरता पुरस्कार ते पुलस सेवा पदक प्रदान कीते।

<><><><><><>

Army Chief

सेना अध्यक्ष जनरल उपेन्द्र द्विवेदी होरें उधमपुर च स्थित फौज दी उत्तरी कमान दिएं कम्में कारवाइएं सरबंधी तैआरिएं दा कल जायजा लैता। उत्तरी कमान दे युनिट जम्मू कश्मीर ते लद्दाख च बी स्थित ना। सेनाध्यक्ष होरें त्रौनें सेनाएं कन्नै सरबन्धत चर्चाएं दी बी प्रधानता कीती जेहदा मकसद त्रौने सेनाएं दी सांझी समर्थ च होर बाद्धा करना हा। एह्दे च फौज, वायु सेना ते नौसेना दे वरिष्ठ अधिकारिएं हिस्सा लैता। इंदे अलावा आईटीबीपी दे अधिकारी बी इस बैठक च मजूद हे। जनरल द्विवेदी होरें उधमपुर आले कमान मुख्यालय दा बी दौरा लाया ते उत्थें बी अधिकारिएं दी इक बैठक लाई। उनें हाल च गै फौज च शामिल कीते गेदे आधुनिक थेआरें ते उपकरणें दा निरीक्षण बी कीता।

<><><><><><>

Cops-Udhampur

पुलसादे इक जवान नै अज्ज बडुलै सवेला उधमपुर जिले च ए.के 47 असाल्ट राइफल कन्नै अपने साथी दी गोली मारियै हत्तेआ करी दित्ती ते फही आपूं आत्म हत्तेआ करी लैती। हासल जानकारी मूजब एहू वारदात अज्ज उसलै होई जिसलै एहू दौनें पुलस कर्मी अपने इक होर साथी दे कन्नै सोपोर थमां एस.टी.सी तलवाड़ा, रियासी बकखी आवा करदे हे। अधिकारिएं मूजब बडुलै उधमपुर दे रैहम्बल इलाके च काली माता मंदरै कश इनें दौनें पुलस कर्मियें दे शव पुलस वैन दे अंदर पेदे दिक्खे गो। जानकारी मताबक आपूं चै त्रिक्खी बैहस होने मगरा हैड कांस्टेबल नै डरैवर गी गोलियां मारी दित्तियां ते फही आपूं बी आत्म हत्तेआ करी लैती। गड्डी च सोआर इक होर सलैक्शन ग्रेड कांस्टेबल उत्थुआं बची निकलेआ ते ओदे शा पुच्छ-गिच्छ कीती जा'रदी8 ऐ। उधमपुर दे एसएसपी अमोद अशोक नागपुरे होरें दस्सेआ जे आरोपी नै फायरिंग लेई अपनी ए.के 47 असाल्ट राइफल दा इस्तेमाल कीता।

<><><><><><>

LG Education

लेफ्टिनेंट गवर्नर मनोज सिन्हा होरें भारत गी विकसित राश्ट्र बनाने लेई ते अर्थबवस्था दे बक्ख-बक्ख खेत्तरें च पूरे-पराते विकास लेई ज्ञान दे खेत्तर च इक नमीं क्रांति दी जरूरतै पर जोर पाया ऐ। जम्मू युनिवर्सिटी दे जनरल ज़ोरावर सिंह ऑडिटोरियम च महावीर इंटरनेशनल स्कूल दे 18में सलाना समारोह गी संबोधित करदे होई एलजी होरें विद्यार्थिं अंदर छप्पी दी समर्थ गी सामने आह्मने च अध्यापकें दी भूमिका पर लोऽ पाई। उनें आखेआ जे छड़ा म्तेहानें लेई गै किश नमां सिक्खने दी भावना गी नकारेया जाना चाईदा ऐ ते नौजवान पीढ़ी गी नैतिक मुल्लें-कदरें दे कन्नै जीवन दे बक्ख-बक्ख पैहलुएं बारै बड़ी संजीदगी कन्नै जानकार बनाया जाना लोडचदा ऐ। एलजी होरें आखेआ जे बच्चें गी पढ़ांदे बेल्ले अध्यापकें गी छड़ा पाठ्यक्रम दे दायरे अंदर गै सीमित नेई होना चाईदा सगुआं उनें गी अपना ज्ञान ते तजुबे बी विद्यार्थिं कन्नै सांझे करने लोडचदे ना।

<><><><><><>

PM-Northeast

प्रधानमंत्री नरेन्द्र मोदी होरें बेहतर संचार, डिजिटल समावेशन ते बुनियादी ढांचे च निवेश दे राहें पूर्वोत्तर दे राज्यें च होई दी तरक्की दी सराहना कीती ऐ। श्री मोदी होर केंद्री मंत्री ज्योतिरादित्य सिंधिया हुंदे इक लेख दे बारै च सोशल मीडिया पर प्रतिक्रिया सांझी करै करदे हे। इस लेख दा विशे ऐ - विकसित भारत दे सुक्खने गी साकार बनाने च पूर्वोत्तर दी भूमिका। प्रधानमंत्री होरें अष्टलक्ष्मी महोत्सव दी बी सराहना कीती जेह्दे च पूर्वोत्तर दे इलाकें च कपड़ा ते सैलसफा दे खेत्तर सने रिवायती शिल्प दे महत्वै पर बी लोऽ पाई जा करदी ऐ। नमीं दिल्ली दे भारत मंडपम च लोआए गेदे त्र'ऊं दिनें दे अष्टलक्ष्मी महोत्सव दा लक्ष्य इस खेत्तर दे 8 राज्यें दी खूबसूरती, बन्न-सबन्नता ते संकल्पें गी उजागर करना ऐ। इनें राज्यें च असम, अरुणाचल प्रदेश, मेघालय, मणिपुर, नागालैंड, मिजोरम, त्रिपुरा ते सिक्किम शामिल ना।

<><><><><><>

IFA-Western

भारती वायु सेना दी पच्छिमी ब्हाई कमान दे कमांडरें दा दऊं दिनें दा सम्मेलन कल नमीं दिल्ली च सम्पन्न होई गेआ। सम्मेलन दुरान चीफ ऑफ एयर स्टाफ, एयर चीफ मार्शल ए.पी सिंह होरें कमान दे कमांडरें कन्नै गल्लबात कीती ते जंग ते युद्ध कौशल च जित्त हासल करने दी समर्थ यकीनी बनाने लेई सिखलाई दी जरूरतै बारै विचार-विमर्श कीता। उनें इस बरे दे विशे- भारत वायु सेना सशक्त, सक्षम ते आत्मनिर्भर पर बल दित्ता ते भारती वायु सेना गी नमीं उंचाइं

तगर लेई जाने लेई सब्बनें कमांडरें गी सांझी समर्थ, दक्षता विकसित करने ते बचनबद्धता यकीनी बनाने दा आह्वान कीता।

<><><><><><>

Weather

स्याले दी सब्बनें शा ठंडी रात मगरा घाटी च घटोघट तापमान च सुधार होआ ऐ जदकि मौसम विभाग नै अगले 2 दिनें आस्तै जम्मू-कश्मीर च हल्की बरखा ते बर्फबारी दी मेद जाहिर कीती ऐ। दक्खन कश्मीर च शोपियां सब्बनें शा सर्द थाह रेई जित्थे तापमान माइनस 4 अशारिया 5 डिग्री दर्ज कीता गेआ। मौसम विभाग दे निदेशक नै जम्मू संभाग दे मैदानी ते पहाड़ी इलाकें दे किश थाहें च हल्की बरखा दी पेशगोई कीती ऐ ते कश्मीर संभाग च 8-9 दिसंबर दौरान उच्चे पहाड़ी इलाकें च बरखा ते बर्फबारी दी मेद जताई ऐ। 10-11 दिसंबर गी मौसम आमतौर पर खुशक रौग ते 12 दिसंबर गी पहाड़ी इलाकें दी किश धारें पर बरखा पेई सकदी ऐ। 13 थमां 17 दिसंबर तोड़ी मौसम खुशक रौग। मौसम विभाग दी अग्रे दी जानकारी दे मताबक पर्यटकें, ट्रांसपोर्टरें गी प्रशासन ते ट्रैफिक एडवाइजरी दा पालन करने दा मश्वरा दित्ता गेआ।

<><><><><><>

Disha-Udhampur

केंद्री मंत्री डॉ. जतिंद्र सिंह होरें उधमपुर ते रियासी जिलें च केंद्र प्रायोजित स्कीमें हेठ हासिल उपलब्धिएं दी नजरसानी करने आस्तै डी.सी दफ्तर उधमपुर च जिला विकास संयोजक ते निगरान कमेटी दी बैठक दी अध्यक्षता कीती। इस बैठक च डीडीसी उधमपुर सलोनी राय, बीडीसी अध्यक्ष ते सारे विभागें दे जिला अधिकारी मौजूद हे। मंत्री होरें पीडब्ल्यूडी, सेहत, ग्रामीण विकास विभाग, राई-बाई, बिजली, शिक्षा, बागवानी, सामाजिक इदारें, रोजगार, बैंक टू विलेज जनेई कई स्कीमें हेठ हासिल उपलब्धिएं दा जायजा लैता। बीडीसी ते डीडीसी गी जमीनी स्तर पर पेश आवारदी परेशानिएं बारै बी बैठक च चर्चा कीती गई ते केंद्री मंत्री जतिंद्र सिंह होरें तौलें गै इनेंगी दूर करने दा भरोसा दोआया।

<><><><><><>

Food-Poisoning

जहरीली रूट्टी खाने करी इक परिवार दे 2 न्याणें सने 4 जनें दी मौत होई गेई ऐ ते दुए 2 लोकें दा इलाज चला'रदा ऐ। जहरीली रूट्टी खाने करी पेश आए दे इस संदिग्ध मामले च इक परिवार दे 4 लोकें दी मौत होई गेई ते दुए 2 जनें दी हालत बी चिंताजोग ऐ। एहू मामला राजौरी जिले दे बधल गोरला इलाके च सामने आया। बिमारें दा इलाज गौरमैंट मेडिकल कॉलेज राजौरी च चला'रदा ऐ। संदिग्ध फूड पायजनिंग दी असल वजह अजें साफ नेई होई ऐ ते जांच जारी ऐ।

<><><><><><>

Smart India Hackathon

औंदी 11 दिसम्बर थमां आयोजित कीते जा करदे स्मार्ट इंडिया हैकाथॉन 2024 दे साफ्टवेयर संस्करण दी मेजबानी लेई आईआईटी जम्मू पूरी चाल्ली तैयार ऐ। मुख्य भरै थमां 30 टीमां, इस दरान साईबर सुरक्षा सरबन्धी बड़ी मती महत्वपूर्ण चुनौतिएं दा नबेडा करने लेई आपूं-चै मुकाबला करडन। आकाशवाणी दे जम्मू संवाददाता दी रिपोर्ट मूजब, आईआईटी जम्मू थमां त्रै टीमां कर्नाटक, दिल्ली ते गुवाहाटी जाइयै अपने-अपने सरबन्धत नोडल केन्द्रें च आईआईटी जम्मू दी नुमाइंदगी करडन। इस राश्ट्रव्यापी पैहलकदमी दा एहू 7मां संस्करण ऐ जेहदा आयोजन शिक्षा मंत्रालय आसेआ कीता जा करदा ऐ। केन्द्री शिक्षा मंत्री धर्मेन्द्र प्रधान होर वर्चअल ढंगै कन्नै एहदा उद्घाटन करडन। मुख्य भरै च इस कार्यक्रम लेई 51 नोडल केन्द्र बनाए गेदे न।

<><><><><><>

Slathia-Samba

साम्बा विधायक सुरजीत सिंह सलाथिया ते विजयपुर विधायक चंद्र प्रकाश गंगा होरें बंगलादेश च हिंदुएं पर होआ रदे अत्याचार दे खलाफ बरोध प्रदर्शन कीता। इस विरोध प्रदर्शन च बक्ख-बक्ख संगठनें, धार्मिक संस्थाएं, आर.एस.एस कार्यकर्ता ते दुए लोकें वीर भूमि पार्क साम्बा थमां शुरू होइये एहू विरोध प्रदर्शन साम्बा शहद दे मुख चौक पर खत्म होआ। सारें कट्टे रलिए मंग कीती जे बंगलादेश च हिंदुएं पर होआ'रदे अत्याचार रोकना चाइदा ते इस्कान दे धार्मिक गुरूएं दी जेल थमां रिहाई होनी लोड़चदी।

<><><><><><>

Asia-Cup

हॉकी च महिलाएं दे जूनियर एशिया कप टूर्नामेंट दे अज्ज अपने पैहले मैच च भारत दा मुकाबला बंगलादेश कनै होग। ओमान दे मस्कट च खेड्डेया जाने आह्ला एहू मैच अज्ज रातीं भाती समें मूजब साड्डे 8 बजे थमां शुरू होग।

<><><><><><>

Chardham

स्याले दी चार धाम यात्रा अज्जै थमां उत्तराखंड च शुरू होई। एहदे कनै गै श्रद्धालुएं गी चार पवित्र धामें दे दर्शनें दा मौका मिलोग। मुख्मन्त्री पुष्कर सिंह धामी होरें अधिकारिक तौरा पर रुद्रप्रयाग जिले च अखिमठ दे ओमकेश्वर मंदर च यात्रा दा शुभारम्भ कीता जित्थे भगवान केदारनाथ जी दी प्रतिमा स्याले दे म्हीने विराजमान रौहंदी ऐ।

<><><><><><>